

良鄉縣志

子勲署簽

襄鄉縣志卷之五

物志

鄉賢 忠烈 孝義 耆老 學校 畢業生 列女

瓌寶之所蘊山水以爲光華神物之所憑澤藪以爲靈國不必其程廣員較尋步也猶國邑以人材爲盛衰不在大小強弱貧富也雖然國邑之盛衰人材爲之人材之盛衰風教爲之耳藉也士之覽斯志者競勸於不朽之業雅歌棫樸風奏兔置則醫無閭之雄奇昭余祁之幽阻滹沱易水之源深而流長何必不在吾燎石一卷聖水一勺間也

鄉賢

賢士大夫生爲儀型歿可傳述古祭於社今祭於庠一也祀因乎賢賢而祀固傳賢而弗及祀亦傳從千百世下夷考其人蓋論定乃益昭大公矣夫醴泉芝草不擇地而生燕桂鄭蘭每應時而出矧良邑爲燕中都地古稱人物俱良賢豪生其間其樹勳立言垂不朽也宜哉茲所志紀祀也亦紀賢也

周

樂毅其先祖樂羊爲魏文侯將伐取中山文侯封以靈壽子孫因家焉樂毅賢好兵趙人舉之及武靈王有沙丘之亂乃去趙適魏聞燕昭王以子之之亂而齊大敗燕燕怨齊未嘗忘報樂毅爲魏昭王使於燕隨委質爲臣當是時齊湣王彊百姓弗堪燕昭王問伐齊之事樂毅對曰齊霸國之餘業也地大人衆未易獨攻也王必欲伐之莫如與趙及楚魏諸侯皆遵合縱與燕伐齊樂毅於是并護秦趙楚韓魏燕之兵以伐齊破之攻入臨淄盡取齊寶物祭器輸之燕昭王封樂毅於昌國號爲昌國君復使樂毅以兵平齊城之不下者樂毅留徇齊五歲下齊七十餘城惟獨莒卽墨未下燕昭王死惠王卽位齊田單聞之乃縱反間於燕惠王使騎劫代將而召樂毅樂毅遂西降趙封樂毅於觀津號曰望諸君後燕惠王悔使騎劫代樂毅以致破軍亡將失齊乃使人讓樂毅且謝之樂毅以書報燕惠王於是復以樂毅子樂閒爲昌國君樂毅卒於趙

晉

霍原字休明燕國薊人也少有志力叔父坐法當死原入獄訟之楚毒備加終免叔父年十八觀大學行禮因留習之貴遊子弟聞而共造焉父友同郡劉岱將舉之未果而病篤臨終勅其子沈曰霍原慕道清虛方成奇器汝必薦之後歸鄉里隱居求志篤古好學縉紳慕之委質受業者千里而應燕王月致羊酒高陽許猛素服其名會爲幽州刺史將詣之主簿當車諫不可出界猛歎恨而止還朝以原名聞擬之西河求加徵聘及劉沈爲大中正舉原寒素吏部郎李重奏應爲二品詔從之拔爲密書郎元康末以賢良徵累下州郡以禮發遣皆不到建興元年幽州牧王浚以父字處道爲當塗高隱王者之讖謀將僭號聞原北州名賢使人問之原不答浚銜之時有童謠曰天子何在豆田中浚以豆有霍遂認原與羣盜通殺而梟其首諸生悲哭夜竊尸共埋之遠近駭愕莫不冤痛

唐

李景略幽州良鄉人父承悅檀州刺史密雲軍使景略以蔭補幽州府功曹參軍大歷末客河中闔門讀書景略氣豪慷慨李懷光爲朔方節度使署巡官五原將張

光殺其妻以貨市獄前後不能決景畧覈實論殺之既而有若女厲者進謝廷中如光妻云遷大理司直監察御史及懷光屯軍咸陽反狀始萌將襲東渭橋召幕府計議景畧曰取長安殺朱泚散軍還諸道單騎詣行在如此臣節亦未虧功名猶可保也頓首懇請至於流涕懷光許之都虞侯閻晏等勸懷光東保河中徐圖去就懷光乃謂景畧曰邇者之議軍衆不從子宜速去不且見害遣數騎送之景畧出軍門慟哭曰不意此軍陷於不義遂遁歸靈武節度杜希全表置於府累轉侍御史豐州刺史豐州當回紇通道前刺史輒柔每虜使至與抗禮時梅錄將軍入朝景畧欲折之因郊勞前遣人謂曰可汗新沒欲弔使者乃坐高壠待之梅錄俯僂前哭景畧即撫之曰可汗棄代助爾號慕於是虜容氣沮索不敢杭以父行呼景畧自此回紇使至者皆拜於庭威名顯聞希全忌之奏貶袁州司馬貞元十年希全卒徵爲左羽林將軍對於延英殿論奏衍衍有大臣風河東節度使李說病以景畧爲太原少尹行軍司馬時方鎮旣重故少召還者惟不幸則司馬代之自說有疾人心固屬景畧矣會梅錄復入朝說大會虜人爭坐說不敢遏景畧叱

之梅錄識其聲拜曰非李豐州邪遂就坐將吏相顧嚴憚說愈不平賂中尉竇文場謀毀去之歲餘塞下傳言回紇南寇文場方侍帝旁卽言豐州當得良將且舉景略乃拜豐州刺史天德軍西受降城都防禦使窮寒苦寒地瘠鹵邊戶勞悴景略至節用約己與士同甘蓼繫咸應永清二渠溉田數百頃儲廩器械舉具公私利焉景略用法嚴威令肅然聲雄北疆回紇畏之貞元二十年卒於鎮年五十五天下惜用景略才有未盡贈工部尙書

周

竇禹鈞與兄禹錫皆以詞學名唐天佑末起家幽州掾爲左諫議大夫致仕廣行陰德置義塾延名儒給衣食以教四方遊學之士生五子儀儼儼侃儼等相繼登科時號竇氏五龍馮道贈詩曰燕山竇十郎教子有義方靈椿一株老丹桂五枝芳
遼

楊績良鄉人太平十一年進士及第累遷南院樞密副使與杜防韓知白等擅給進士堂帖降長壽軍節度使徙知涿州清寧初拜參知政事兼同知樞密院事爲南

府宰相九年聞重元亂與姚景行動王上嘉之十年知興中府咸雍中入知樞密院事二年乞致仕不許拜南院樞密使興宗以舊臣特召燕見論古今治亂人臣邪正方今契丹忠直無如耶律玠漢人則劉仲而已然熟察之仲又不如玠之剛介績拜賀曰何代無賢遇亂世則獨善其身遇明主則兼濟天下陛下銖分邪正升黜分明天下幸甚八年六月甲戌封績爲趙王太康中以例改王遼西致仕加守太保薨

金

韓懿字偉之北趙里人登天會六年進士官至朝散大夫前安東節度判官騎都尉南陽開國男食邑三百戶賜紫金魚袋懿未第時亡命殘擾乃糾北趙村附近少壯捍衛鄉里賴以安

翟永固字仲堅中都良鄉人太祖與宋約攻遼以燕歸宋宋人以經義兼策取士永固中第一授開德府儀曹參軍金破宋永固北歸又中天會六年詞賦科授懷安丞遷望雲令補樞密院令史宗翰愛其能辟爲府掾永固家貧求外補宗翰不許

以錢三千貫周之薦於朝攝左司 中除武定軍節度副使歷同知清州防禦使
入爲工部員外郎以母憂去官起復禮部郎中遷翰林直學士海陵纂立命副完
顏思恭爲宋報諭使就令伺察動靜使還改禮部侍郎久之分護燕京宮室役事
永固請寫無逸圖於殿壁不納俄遷太常卿考試貞元元年進士出尊祖配天賦
題海陵以爲猜度已意召永固問曰賦題不稱朕意我祖在位時祭天拜乎對曰
拜海陵曰豈有生則致拜死而同體配食者乎對曰古有之載在典禮海陵曰若
桀紂曾行亦欲我行之乎遂與張景仁皆杖二十俄遷永固禮部尙書賜笏頭龜
文金帶改永定軍節度使正隆二年例降二品以上官爵永固階光祿大夫不降
以寵異之遷翰林學士承旨與直學士韓汝嘉俱召至內殿問以將親伐宋事永
固對曰宋人本朝無釁隙伐之無名縱使可伐亦無煩親征遣將帥可也山是大
忤旨永固卽請致仕歸臥於家大定二年起尙書左丞請依舊制廉察官吏革正
隆守令之汙從之明年表乞致仕不許罷爲眞定尹賜通犀帶尙書省奏永固自
執政爲眞定尹其繼蓋當用何制度上曰用執政制度遂著爲令五年懇乞致仕

許之六年薨

梁斗南字拱宸良鄉人性穎悟工詩讀書閩山與同舍生論及鬼神斗南以爲不足畏同舍生曰閩山廣寧廟汝能夜獨往乎斗南曰諾當挈其壁爲驗往則遙見殿上燈燭照耀聞曰丞相來燈燭盡滅斗南以筆挈殿壁間由門至北東隅暗中觸一物捫之則人也携以歸乃一女子有殊色問其故曰妾蘇州人因清明觀擊毬忽怪風晝晦昏暗中不省至此而爲公所救人皆驚異事聞詔以女配斗南生二子謂之天賜夫人云斗南登進士第一累官至河南都運有幹局長於吏事能剖繁治劇時輩服其通敏二子敬恭敬左司郎恭仕元世祖性行端潔寵遇甚厚官至金紫光祿大夫中書平章事

元

梁德珪字伯溫良鄉人年十一給事昭睿順聖皇后宮令習國語通奏對由中書左司郎中六遷至參議尙書省事執政入奏事帝詢其本末不能對德珪從旁辯析曉暢帝大悅拜參知政事是歲至元卅一年也在省久凡錢穀出納銓選進退諸

藩賜予或上命驟至不暇閱簡牘同列莫知所對德珪從容數語卽定間遇疑事則曰某事當如某律某年嘗有此旨驗之皆然京師地震世祖怪州郡報囚之數過多德珪曰當國者急於徵索蔓收延繫以至此爾帝悟爲赦中外逋負衆民賴以蘇大德元年爲中書左丞二年爲中書平章事務以安靜輔治求進者不得逞由是明聚興怨欲撫事中傷之初朱清張瑄以金帛賂貴近事敗御史杜肯構等言旺札勒等與二人交通宜罪之與巴延巴特瑪琳沁迭同罷明年復位杜肯構言巴延等樹黨受賂謫戍遠方道路相慶方今數月遽聞召復相位又與原鞫者列坐朝堂天下之人目巴延梁德珪巴特瑪琳沁爲三凶三凶不誅無以謝天下乞將羣凶或斥或誅明正其罪章數十上皆不報德珪以位居執政不受凌轢慷慨引咎遂安置湖廣帝疾愈問知之召使復位既至帝問卿安在德珪涕泣不能語賜酒饌使往拜其母因以氣疾乞骸骨歸大德八年九月卒於家年四十有六梁陟舉進士以名儒徵領燕京編修所事卒諡通獻先生

明

趙錦正德丁丑進士歷官兵部尙書加太子太保功業詳墓誌銘

楊秦字濟之良鄉人生而英敏端慤不妄笑語爲兒時父問之曰汝志何如曰我欲爲御史父奇之遣就學讀書卽曉大義長爲弟子員弟子員皆弗若也正德庚午領順天鄉薦丁丑登進士第已卯除行人司行人武宗南巡秦率同列抗疏諫廷杖謫國子監學正嘉靖元年復任行人授福建道監察御史正色直言彈劾弗少避其奉勅陝西清戊也查盤軍器照刷文卷清審刑獄民用大悅先是抽丁補伍輒復散亡秦曰是貧所致耳迺察其殷富者使厚遺之貪吏冒逃卒以私餉者歲逾數千石秦愾諸邊得其情俾悉償焉因奏建局除戎器又疏請惜人才以隆治化時少師楊石琮總制邊務一旦過陝講武病其器敝秦令悉易之石琮嘉之曰我軍固有恃哉三年復命攝四道事有囚當死託鄉人以千金賂之秦叱之曰我知其法耳不知其賄自是疏之議廟制劾禮官依違不決出爲四川按察司僉事平寇有功賜金綺蜀大饑廷議命藩臬二人賑濟皆曰非楊僉事不可乃周歷郡縣區處咸宜凡數月力憊而疾殆竟卒年四十八子守正守公守公性孝友嘉靖

三十一年應試薦時兄守正爲副守公白學院阮鶚讓兄應薦守正固辭守公固讓誠懇甚切阮爲之動容檄邑旌其閭曰孝友之門

清

張元樞良鄉人順治四年進士任浙江處州府推官嚴句引營兵賭博之禁按行屬邑踏勘荒田請蠲逋賦時寇氛未靖間有株連輒胥宥之其他修學課士尤多善政處民至今稱之

楊之柄字伯梁號九春良鄉人順治十六年舉人除稷山縣知縣陞刑部主事簡審波府知府爲人性直而通敏處事一以是非爲斷不徇人毀譽曰行吾心所安而已爲文疏宕有奇氣山東有黃家瑞者令良鄉奇其才厚遇之黃文力追兩漢少許可而獨心折之柄自以爲不及後移宰他邑招入幕其讞獄之文必假手成之嘗曰吾堂可無吏吾幕可無客其莅稷山也初下車聞前令賢慨然曰居官當如此矣稷經庖瘠後之柄殫心撫字不遺餘力其大者請蠲荒地逋糧三萬餘減舊額之半編邑戶三十六里爲二十四里均役輪差以故賦薄徭輕民至今賴之其

官比部也佐以經典所全活居多曹郎例分覽案牘一字失簡則有堂責人多厭苦之之柄封繳獨先同官每私託代直之柄欣然應之爲兀坐署中循閱無倦容曰吾卽以此練勤且諳習故事不猶愈乎故其守寧波也凡六年精密宏達處盤錯能迎刃解如除吏弊裁差擾折訟獄懲豪猾賑荒弭盜諸政罔不措理適如其尤難者舟山之役軍書旁午凡備糗儲芟造舟治甲百務畢萃於一身之柄目矚耳聽口答手揮環中四應不病民而事舉濟之柄初至郡時浙大吏欲廉某陰事之柄曰良令也保無他大吏又命監司示意必欲實其言之柄又曰不可令賴以全其持正不阿如此未幾以疾卒卒之日城門卒若聞呵殿而出者或云見之柄從騎入廟故民爲立祠至今尸祝之不忘焉事聞入祀名宦

徐肇興號曜靈生而恂謹寡言笑年十一喪父無伯叔兄弟惟母氏是依年十八入泮母年逾六旬肇興遂澹榮利家居務農以奉母承歡養志昕夕不離左右宗族以孝稱日奉甚儉卽布衣不敝盡不改作而遇事慷慨戚友中生養死葬無力者輒贖之邑有凶荒務謀賑濟全活無算歌頌見於道路假人財不立券常曰情重

錢輕償不償聽之斷不可留一紙書致後人索償以沒前情也生平黜華崇實接物以忠恕無間初終治家有條理舉動悉取法先民有子七或授詩書或教騎射使各有成就以故登甲乙科貢成均廩增附咸備年五十八一日觀戲歸方弄孫一臥不起其生平行事至今嘖嘖人口云

張垌字魯平號厚菴學者稱爲厚菴先生天性孝友早歲遭父喪哀毀骨立事母尤孝謹父歿事無鉅細悉稟命於長兄慷慨好義以濟困扶危爲已任家少儲積而宗族孤寡不能自給者悉贍之其間業師文安陳喬皇老而貧垌歲得館金悉以相奉喬皇歿并賜其子孫館於常氏常有停柩三不能葬家不及中人產而負債累數千是年老壯三人歿於疫惟其徒景仁年十三僅存垌爲摒擋葬六柩償夙負撫景仁成立爲授室焉其友庠生吳信夫歿其子不才家頓落垌賜其困且善教之卒克家年三十潛心性理學問無所不優尤能躬行實踐執業門下者百餘人貧者不責修脯且恆賜之教人以忠信爲根本以莊敬爲規模以五倫五事爲實行講貫經史反覆發明使人體認以收實效晚年益歛英銳之氣漸入渾然持

心虛而見義必勇約以奉已濟物不少各接人嚴不使人憚和不使人狎蓋得於道者深也爲歲貢生候選訓導累薦不第母沒遂不應舉無子以姪孫三泰爲之孫年五十而卒里人聞而輟業及葬涕泣臨穴者四百餘家著有四書叢說待梓邑宰爲申請崇祀鄉賢

游觀第號杏村任家營人幼聰穎讀書別有會心及長受業張魯平之門學益進咸豐乙卯領鄉薦庚申成進士由知縣改就教職歷任順德河間廣平教授所至整學規端士習毅然以斯文爲己任一時名士皆從之游前後受業者不下數百人性而易與人交相待以誠無急言遽色而義利之界則介然不可犯任後沉中丞知順德府時重其品學值大計吏以卓異薦得旨在任候陞後選授湖北廣濟縣知縣因病未赴旋卒於廣平任所年五十五歲生平講學以經術爲根本著述甚富有四書講義說詩錄古今體詩暨科舉文若干卷藏於家

忠烈

士大夫值多事之秋本期上衛社稷下保生民非僅以一死塞責也迨至事不可爲慷慨就義捐軀以報國家亦賢者之不幸矣然而俎豆旂常一息千古名重於竹帛賞逮於子孫以視夫碌碌庸庸終老牖下者其相去不啻霄壤非所謂死重於泰山與孔子曰殺身以成仁禮曰臨難毋苟免讀斯志者可以想見其人矣

明

王景正德四年流寇亂景代父從征至太和縣歿於陣

張其廉任陝西鳳翔府通判遷鄖陽府同知隨督師征流寇戰歿汴梁

侯鼎祿鼓腹屯人以賢良方正授山西霍州州判遇流寇之亂殉難

陳蠡測武舉崇禎二年大兵破良鄉與生員梅友松同時殉難

梅友松生員崇禎二年殉難

張子卿字君貴號調鼎石羊里人以賢良方正授山東濟南府陽信縣知縣崇禎壬午殉難癸未題贈奉政大夫山東題刑按察司僉事廕一子入監

史崇文大甯縣典史崇禎十七年城陷陣亡

孫文華字雲臺美化里人出行伍崇禎十一年任山海關守備十五年歸里十七年遇流寇十八騎於長溝峪紅門隻身抵敵殺三賊因失足爲賊傷戰歿

清

袁生芝明崇禎丙子科舉人任山西長子縣知縣順治初官商維道城陷自經死合門死者三十二人

楊三知字伯筠良鄉人順治三年進士任榆次縣知縣有惠政擢兵部主事陞本部郎中累遷神木道會提督王輔臣反邊將朱龍應之三知方以代覲還抵保德或止之曰事亟矣公無渡河三知不聽抵鎮日夜爲守禦計而守將孫崇雅開門納賊執三知命之降不從衆拔刃相擬脅取勅印又不與賊擁之至署三知給賊出急呼妻妾子婦悉投井中三知別赴一井賊偵之急負出之右臂已折而不死大罵賊不絕口賊閉之一室令卒環守仍誘之降一日夜不從賊怒闔扉驅人出其卒在戶外聞掙擊聲殷殷震牆屋三知罵賊聲乍高乍下久之寂然賊啓扉去則三知已死其室無完器三知體亦無甚傷不知三知若何死也事平贈光祿寺少